

弘

簡

錄

弘簡錄卷六十六

明刑部員外郎仁和邵經邦弘齋學

皇清翰林院侍講學士四世孫遠平校閱

雜行 唐十二之八藩鎮盧龍
淄青澤潞

李懷仙朱希 朱滔 劉惔子濟 朱克融 李載義

楊志誠史元 張仲武子直 張允伸 張公素

李茂勳 李全忠子匡 劉仁恭子守光

侯希逸 李正己子納孫師古 劉悟子從諫從孫良附

李懷仙本柳城番人善騎射智數敏給世事契丹守營州為祿

山裨將從陷河洛又事史思明方思明盜河南留次于朝清守

幽州以阿史那王高如震輔之及朝義弒立移檄誅朝清二將

亂朝義偽授懷仙燕京留守充范陽尹使督兵馳入如震欲拒

不及乃出迎懷仙外示寬假以安士心居三日大會諸將斬如
震內外悉定及東都已平副元帥僕固懷恩率兵追朝義賊黨
聞風納欵中人駱奉先間遣鵠說懷仙遂降遣將李抱忠引兵
三千往范陽拒朝義閉關不納朝義乃縊死懷仙斬其首因奉
先以獻懷恩保薦其才可用代宗授幽州大都督府長史檢校
侍中充盧龍等軍節度使封武威郡王旣而懷恩叛西蕃入寇
朝廷多故各務招合遺孽治兵繕邑部下勁兵數萬自署文武
將吏私其貢賦不入朝廷名雖稱藩實非王臣以時姑務懷安
且不制之大曆三年兵馬使朱希彩朱泚并弟滔同謀殺懷仙
族其家希彩自稱留後張忠志遣將率衆討之復爲希彩所敗
朝廷不獲已宥之拜王緡幽州節度使授希彩副使兼御史中
丞權知軍州事緡建旌節徐驅赴鎮希彩蒐選卒伍大陳戎備

迎謁甚恭縉知希彩終不可制勞軍旬日而還遂加希彩御史大夫知留後事尋授節度使五年封高密郡王得位後暴橫自恣無禮於朝廷七年孔目官李瑗因人之怒伺隙斬之共推泚爲留後後爲叛逆

朱滔尤狡譎變詐百出希彩以同姓托爲心腹令將親兵泚爲節度遣將勁兵三千率先請軍赴京備邊代宗以山東方偏強泚首效臣節大喜手詔褒美命滔勒兵東入長安通化門西出開遠門以示優異對於三殿臨軒勞問卿材孰與泚多滔曰各有長短統御士衆方略明辨臣不及泚臣年二十八獲謁龍顏泚長臣五歲未朝鳳闕此不及臣上愈喜令屯涇州置酒開遠門餞之戍還設謀奪泚兵說以天下諸侯未有朝者若兄肯先至可得天子意光寵無量泚信之令攝後務甫離鎮卽殺有功

李璣等二十餘人剪泚牙爪。泚自知爲滔所賣。不得志。請留京師。授滔試殿中監。權知幽州盧龍節度。留後兼御史大夫田承嗣反。與寶臣正已解磁州圍。及惟岳拒命。又與張孝忠往征。大破其軍於束鹿。守以偏師。明年。惟岳及田悅援兵圍束鹿。王武俊以騎方陣橫進。滔繪帛爲獅狔象。蒙以猛士百鼓譟奮馳賊馬。驚亂隨擊。大破之。惟岳焚營而遁。以功加檢校司徒。正拜節度使。使隸德棣二州。尋以失深州。心懷不平。又請恆定七州所賦供軍。不許益加忿怒。悅乃間滔與武俊同叛。滔激怒其衆曰。始天子約取成德所得州縣。賜有功者。今乃見奪。奏賞又不報。可疾趨破馬燧軍。以取貲糧。軍中不應。三號之。對曰。幽人死於南者。骸尙不斂。痛藏心髓。奈何復欲暴骨耶。司徒兄弟受國寵恩。士各蒙官賞。願安之。毋卹其他。滔怒潛殺不可者數十人。日

知發其謀因燧以聞天子重起兩寇封涓通義郡王賀戶三百
翼悅其心涓愈倖分兵屯趙州矯發曰知糧引兵救悅軍又大
譟曰天子令司徒北還寧有詔南向耶裨將蔡雄諭曰本鎮苦
無絲續翼以佐調今顧不得又天子以帛賜有功爲燧掠去今
引而南非自爲也軍中堅執以爲違詔莫如引還涓回次深州
大誅麾下二百人衆懼乃率兵南壁寧晉與武俊合涓屬鄭雲
達田景仙皆奔馬燧已而破懷光軍遜於武俊曰篋山之勝王
大夫力也官屬共議師久在外動輒無名長爲叛臣士何所附
且古有列國連衡今請南結李希烈並建號用天子正朔擇日
定約不如盟者共伐之涓惡燕安史所起今已敗冀堯所都後
世崇之因號翼王共擇以建中三年冬十月庚申爲壇魏西祀
天各三讓就位推涓爲盟主稱孤武俊等稱寡人是日三叛軍

上俱有雲氣頗異先是魏土忽高三丈鄉民韋稔佞悅謂為益
土之兆後二年涓等壇壝正值其所涓改幽州為范陽府以子
為留後稱元帥劉忬為留守所居稱殿妻曰妃子為國公下皆
稱臣謂已為殿下上書曰歲所下曰令置左右內史視丞相內
史令監視侍中中書令東西侍郎視門下中書東曹給事西曹
舍人視給事中中書舍人司議大夫視諫議六官省視尚書東
西曹僕射視左右丞相御史臺曰執憲置大夫至監察御史驅
使要籍官曰承令左右將軍曰虎牙豹略軍使曰鷹揚龍驤以
柳良器李子干為左右內史兄瓊現陸慶為東西曹僕射楊霽
馬寔寇贈楊榮國為司文司武司禮司刑侍郎李士真樊播為
執憲大夫并中丞其餘以次補署聘處士張遂王道為司諫燧
遣李晟將兵至易定率張茂昭攻涿莫以絕涓援明年圍清苑

滔將鄭景濟固守使馬寔與武俊將兵拒熒自引兵萬餘救清苑絕晨糧道孝忠合晨兵千人城萊水滔驍將烏薩戒襲殺之滔進軍薄晨營景濟立幟爲應晨戰不利城中兵出晨大敗奔易州茂昭走滿城滔回屯河間不進武俊疑滔心懷不可隄防使宋端趣讓滔怒曰孤亟戰且病就醫藥而王已云然如孤背兄棄君而南救魏王必相疑今亦聽王所爲端還武俊謂寔曰寡人望王速來指蹤決勝負復何惡王異日弁天下寡人得六七城爲節度使足矣因與田悅潛謀絕滔相率歸順及泚反悅武俊遣使至河間賀泚卽位詭請寔共攻康日知謀覆其軍不克泚遣人立滔爲皇太弟密召趨洛陽滔發書西向再拜移檄詣道今發突騎四十萬與皇帝會上陽宮引悅連和俱西令武俊以兵五千從攻洛又欲僭稱帝乘輿法從皆具初奚王娶回

紇女因亂逃歸道平盧滔張錦繡待之再請爲婚女悅許焉旣而遣使修壻禮於回紇報以名馬重寶及是以二千騎從過幽州使說其酋達干曰若同渡河而南玉帛子女可得不貲達干許諾滔兵過武俊境親出勞之悅背盟不出儲峙于野滔至貝州適刺史邢曹俊上謁歸卽閉城堅守滔疑之武俊陰縱反間曰悅有憾欲斷公歸路宜少備之滔聞大怒使回紇大掠南及澶衛盡係老幼悅大恐闔城自保復遣將楊布畧定館陶屯平恩置官吏乃整軍北還使馬寔屯冠氏德宗在山南令武俊抱真叶力擊滔滔急召寔至貝州士馬頓乏請休三日蔡雄與達干促明日交戰楊布謂大王將取東都逢小敵卽怯何以長驅天下耶術士尹少伯又言必勝旣而爲二軍所乘大敗執大將朱良祐李進委仗如丘滔奔德州恨少伯雄布誤已殺之俄而

京師平滔已敗不能軍走還幽州上書待罪自此氣沮索病日
益死年四十二贈司徒

劉忬幽州昌平人滔姑之子少爲范陽裨將以親老去職事滔
積功至雄武軍使廣墾田節用度以辦治稱遷涿州刺史滔討
田承嗣表知留後以和裕得衆心李寶臣以兵劫滔于瓦橋乘
勝欲襲幽州忬設方略勒兵完守寶臣不敢謀以功加御史中
丞嘗爲書以諫滔曰司徒位崇太尉尊居宰輔恩遇極矣今昌
平有太尉卿司徒舉足垂不朽但能以忠順自將則事無不濟
若安史遺臭何足掛齒滔雖不從亦無疑貳每出必總府事滔
催張孝忠襲已使忬壁險而軍及滔敗歸疑忬曷已彷徨不敢
入忬蒐兵繕鎧夾道二十里迎謁望滔而哭滔遂入府委以政
事人嘉忬忠於所奉滔死軍中推忬總軍事俄詔兼御史大夫

充幽州節度如故事封彭城郡公居鎮三月卒年五十九贈兵部尚書諡曰恭 子濟母孀甚艱既產見一大蛇黑氣勃勃莫不驚走及長頗異常童所居室焚人皆驚救濟從容而出衆異之游學京師登進士歷莫州刺史兼御史中丞充行軍司馬忤卒請依朝廷從之加檢校兵部尚書知留後事貞元五年遷左僕射充節度使時烏桓鮮卑數寇邊濟帥軍擊走之窮追千餘里至青都山斬獲不可勝紀東北晏然還鎮益務恭順朝獻相繼德宗亦接以恩禮加同中書門下平章事順宗遷檢校司徒元和初加兼侍中奉詔討王承宗令長子紕攝留務親帥兵七萬先諸軍斬數千級生禽三百人優詔褒異復獻詩四韻以表忠憤之志攻拔僂陽明年屯瀛州進攻安平命次子總以兵八千先登日中拔其城前後大獻俘獲官子孫六品者四會赦承

宗進兼中書令未幾有疾總忌于傅襲與判官張玘孔目成國
寶謀亟追緝還與親吏唐弘實毒濟死年五十四繼至涿州復
矯命殺之乃發喪贈太師諡曰莊武 總性陰賊尤險譎爲行
營都知兵馬使旣行弒逆卽領軍政朝廷不知其姦詔嗣節度
封楚國公進累檢校司空永宗再拒命總遣兵取武強輒持兩
端以利朝廷供饋憲宗優容之外示崇寵進同平章事總以諸
叛皆平大失黨援又數見父兄爲祟日延數百僧晝夜誦佛宥
過不敢入內晚年益甚自髡剃爲僧冀以祓除抑將譚忠說曰
天地之數離合不常河北離六十餘年數窮必合今兵駸駸北
來趙人已獻德棣二城助魏破齊惟燕無一日勞竊爲君憂總
泣且謝因以判官張臯主留務上疏獻馬萬五千匹欲割所治
爲三以幽涿營爲一府請張弘靖治之瀛莫爲一府盧士攻治

之平蒯媽極爲一府薛平治之會穆宗欲速得范陽宰相崔植杜元穎無遠謀但寵弘靖欲重其權全付以地惟分瀛莫置觀察使拜總檢校司徒兼侍中徙天平節度使仍賜浮屠服號大梵師榜其第爲佛祠使給事中薛存慶宣慰給復所部一歲賜緡錢百萬勞軍高年惇獨不能自存者官吏就問賜以粟帛總饒節甲衣浮屠服與譚忠俱行軍中擁留夜中間去進明始知至易州界暴卒詔贈太尉子礎及弟約十一人至長安皆擢刺史并宿衛忠護喪至亦卒忠絳人喜兵善謀事乃健男子 澶濟異母弟也少涉書史工武藝好施愛士人爲致死始事朱滔陳君臣大分裁抑其凶怍病侍湯液未嘗離側以治命名濟嗣位濟德澶奉已奏爲瀛州刺史許代已任久之濟自用其子爲副大使澶一無所望因請自戍隴右悉拔所部兵并男女口馳

歸京師所從萬餘無一敢違令者。德宗甚寵之。拜泰州刺史。隴
右經畧使。軍以普潤爲名。卽縣治。爲理所。治兵不設音樂。士卒
有病親往存問。不幸者哭之。順宗已禪。憲宗方士羅令則特得
倖。妄陳廢立所言。皆不道。擁械送闕下。殺之。錄功封彭城郡公。
號其軍曰保義蕃戎。畏懼不敢入寇。常愼然有志欲恢復河湟。
屢爲朝廷言之。未見省。及病。籍士馬求代。還卒于道。年四十九。
贈右僕射。諡曰景。

朱克融。涇州孫。父洄素號詭譎。世濟其惡。至克融尤甚。初爲軍校。
事劉總。總將歸朝。慮後有變。悉籍軍中材勇。與黠暴不制者遣
上。賜冀朝。廷厚與爵位。使北方歆。監其榮。無甘。亂心。克融在焉。
會時無經國遠畧。兼不知兵。見總納地。曠然謂天下無事。留克
融等京師。久不得調。數詣宰相。願得官自效。皆抑不與。羸服變

色饑寒無倚。內怨且忿。會張弘靖赴任。悉勒還鎮。弘靖旣被囚。洄方疾廢。卧家軍中。往請爲帥。堅以老辭。因推克融領軍務。衆
哄然從之。朝廷除劉悟爲節度使。馳往赴鎮。而瀛冀皆附克融。
悟不得入。克融縱兵掠易州。敗兩縣再寇蔚州刺史柳公濟。與
戰白石嶺。斬三千級。轉寇定州。陳楚復破其兵於望都及北平。
斬獲萬餘。會鎮州又亂。議者謂三賊均逆。罪有輕重。克融全弘
靖不敢害。可悉兵先誅趙。而赦燕。朝廷自度幽薊未可復取。乃
拜克融檢校左散騎常侍。節度使如故。明年陷弓高。攻下博。與
王廷湊共圍深州。裴度以檄譙諭克融。乃還。因與廷湊並加檢
校工部尚書。裴獻馬萬匹。羊十萬口。先請其直。以給軍賞。敬宗
初遷檢校司空。賜遶屯時服。克融以帛疏惡囚。勅使楊文端奏
請將兵馬二萬匠丁五千助修東都宮闕。迎陛下臨幸。預乞帛。

三十萬匹備三軍一歲費不爾軍情擾動帝怒用裴度謀恐不
問答以好言屈其謀進爵吳興郡王是年五月軍再亂殺克融
及其子延齡詔贈司徒次子延嗣自領留後既竊父位不遵朝
旨虐用其民李載義因衆不忍殺之暴其罪于朝并族其家

李載義常山愍王後世稱武力爲幽州屬郡太守載義少孤生
有勇力善挽強角觝與鄉曲之傑出者遊劉濟見而偉之置於
親軍屢從征伐有功遷衙前都知兵馬使兼監察御史寶曆中
拜檢校戶部尚書兼御史大夫充幽州盧龍節度使封武威郡
王始送張弘靖妻子還京雖僮厮畢行李同捷欲與連和遣人
賂遣載義表獻于朝仍請討以効勞績上嘉其誠擢檢校右僕
射累破賊軍以功加檢校司空金紫光祿大夫滄景平復加平
章事賜玉帶并實封三百戶太和四年擊走契丹寇邊禁其名

王開拜太保五年春爲部下楊志誠所逐與子正元俱奔易州
上言在鎮屢請入朝未遂今願將妻子入見上多其有功且辭
恭順許之遣中使抵太原慰迎就賜袍笏裝器其年改興元尹
山南西道節度觀察等使七年兼太原尹北都留守移之河東
進階開府儀同三司母憂起復驃騎大將軍餘如故回鶻每遣
使入朝所至強暴突入衙市長吏多務苟安不敢制之以法防
守雖嚴蕃益驕悍有李惕者尤凶黠鞭捶驛吏貪求無已載義
名語之曰可汗使將軍朝貢以固舅甥之好未嘗使將軍暴殘
中原今朝廷待蕃客以禮饗餼至厚苟有不潔吏當坐死若將
軍部伍不戢凌侮上國剽掠廬舍是乃爲盜法所必誅奈何以
法令可輕而不加戒勵乎命罷防守之兵惟使兩卒司其門蕃
人之無敢犯令九年加侍中部內請立碑紀功詔李程爲之帝

聞尚未有字因稱書曰凡厥正人既富方穀卿宜富之乃以方穀爲字其寵待如此卒年五十贈太尉其母葬范陽爲志誠殯掘後志誠被逐妻息道太原亦盡殺之

楊志誠本幽州後院副兵馬使太和五年朝廷遣中使賜李載義德政碑文因延之飲宴擊鞠爲樂志誠預戒凶黨以須遂於鞠場呼叫謀亂自稱本道馬步都知兵馬使文宗聞之驚懼急召宰相臣商議時牛僧孺先至上問今日其事若何僧孺以爲不煩聖慮上驚問何也對曰范陽得失不繫國家休戚自安史以後皆然若今日志誠之得猶前日載義之失也且國家所賴范陽者以其北界突厥不令南寇度量事宜不如假以節鉞彼將自惜土地爭先盡力自得爪牙之用臣固曰不足煩聖慮上大喜曰如卿之言吾洗然矣尋命嘉王運遙領節度大使以志誠

爲留後檢校左散騎常侍兼幽州左司馬尋改檢校工部尚書
節度使如故七年轉檢校吏部尚書進奏官徐迪詣中書曰軍
中不識事體只知自尚書改僕射爲遷何知工部轉吏部爲美
今一府盛服以待新恩若復爲尚書軍中必慚會遣春衣使魏
寶義兼他使焦奉鸞尹士恭至鎮果爲所留復遣將王文頴謝
恩并讓官職帝納裴度言務合垢不責改賜官誥加檢校右僕
射其桀驁如此踰年復爲三軍所逐而立史元忠因進志誠所
造袞龍衣二副及校服鞍轡皆絳飾鸞鳳日月之形或爲玉字
因仆御史臺按問流之嶺南行至商州殺之詔以通王淳遙領
節度授元忠左散騎常侍幽州大都督府左司馬知府事充節
度留後明年轉檢校工部尚書領鎮如故會昌中爲偏將陳行
泰所殺

張仲武范陽人舊將光朝子少業左氏春秋擲筆棄去爲薊北
雄武軍使行秦旣殺元忠軍中推主留後李德裕訃河朔請卽
皆報下太速故軍得以自肆若少須下且有變帝許之無何行
秦果爲次將張絳所殺復誘其軍以請亦置未報時回鶻爲黠
戛斯所破烏介可汗託天德塞上而仲武遣軍吏吳仲舒入奏
請以本軍擊回鶻德裕因問北方事仲舒曰行秦絳皆遊客人
心不附仲武年五十餘通曉儒書習戎事性抱忠義久願歸欬
朝廷又問卽以帥軍中得無復亂者乎答曰仲武素得士心若
果拜命必有逐絳者德裕入白帝乃授兵馬留後而詔撫王統
遙領節度大使詔下軍中果逐絳卽拜仲武檢校工部尚書兼
御史大夫封蘭陵郡公長史節度如故俄而回鶻特勒那頡頏
擁赤心部七千帳逼漁陽仲武遣其弟仲至與裨將游奉寰等

率銳兵三萬破之收其侯王貴族千餘降三萬人獲馬牛橐駝
器械不勝計遣吏獻捷進檢校兵部尚書兼東面招撫回鶻使
先是奚與契丹皆有回鶻監護使以督歲貢因諷刺中國爲奸
仲武遣裨將石公緒等厚結二部執殺爲奸者入百餘人謀知
回鶻欲入掠五原先以宣門將軍詭詞結歡潛伺邊釁因留之
不遣緩彼師期至人馬多有病死者自此不敢犯塞烏介失勢
往依康居盡徙餘種寄黑車子部回鶻遂衰仲武威名加于北
狄表請立石以紀聖功詔德裕爲銘揭碑盧龍文載舊史大中
初又被奚北部及山奚俘獲雜畜不貲擢檢校司徒同平章事
卒諡曰莊 子直方以右金吾將軍襲節度留後俄進副大使
性暴率舉動多不法下吏僕婢有小罪輒笞殺畏下變起託以
出敗奔京師宣宗遣使者郊勞加大將軍給檢校工部尚書

久之遷檢校右僕射耽嗜馳獵常宿衛不時入下遷驍衛將軍復積前惡貶思州司戶久乃再歷羽林統軍縱部下爲盜復貶康州司馬乾符中累進左驍衛大將軍鄭畋言仲武會昌時功第一陛下錄功念舊宜少優假詔還僕射進左金吾衛大將軍黃巢入京迎于淇上坐納亡命謀劫巢報天子公卿多僞之賊覺屠其族。

張允伸字逢昌范陽人曾祖秀檀州刺史祖嚴納降軍使父玘拔世仕幽州軍門允伸累任押衙兼馬步都知兵馬使大中四年直方出奔大將周繼寢疾軍中表允伸爲留後詔可加右散騎常侍其年冬賜旌節遷檢校工部尚書咸通九年累加至光祿大夫檢校司徒兼太傅同平章事封燕國公龐勛之亂請以弟允舉領兵懿宗不允進助軍米五十萬石鹽二萬石詔嘉之

賜以錦彩玉帶金銀器等冬又加特進兼侍中以風恙許就醫藥卒年六十八贈太尉諡忠烈凡領鎮二十三年克致勤儉比歲豐登邊鄙無虞軍民用乂至今談者美之有子十四人簡會檢校工部尚書充節度副大使簡真幽州左司馬先卒簡壽右領軍衛大將軍餘咸昇朝至刺史郡佐

張公素范陽人咸通中事允仲爲幽州軍校素有威望爲幽人所服遷平州刺史允仲卒公素領州兵赴鎮簡會知不能制卽奔入朝投諸衛將軍軍中遂立爲帥朝廷尋授旌節累加至中書門下平章事素性暴厲旣居節鎮不爲軍士所附軍中以眸子多白號白眼相公無幾李茂勳奪其位公素歸闕貶復州司戶參軍

李茂勳本回鶻阿布思之裔善騎射性資沈勇張仲武時與其

侯王偕降仲武器之任以爲將常遣開拓邊疆積功封郡王賜
國姓及今名陳貢言者燕健將爲納降軍使軍中素所信服茂
動密謀殺之因舉兵給稱貢言反公素迎擊不利而走茂勳入
城因推主州務奏聞于朝卽降符印爲幽州節度使俄以病告
老授右僕射致仕表其子可舉爲節度副使幽州左司馬加右
散騎常侍知留後事朝命進節度使擢累檢校太尉中和末李
克用始魁厚結王處存可舉慮其窺伺山東大爲已患遣使約
吐渾都督赫連鐸乘其背已與王鎔合謀舉兵揚言易定燕趙
舊屬則得其地共分有之遣司馬韓玄紹擊沙陀敗之藥兒嶺
斬首七千級殺其酋朱耶盡忠收牛馬器鎧數萬又戰雄武軍
殺獲萬人鐸與沙陀戰破之蔚州詔拜鐸雲州刺史進可舉檢
校侍中可舉遣粟將李全忠率衆六萬圍易州鎔以兵攻無極

處存求援克用自將赴之鎮人懼退保新城克用急攻之銘引去迫破之九門易久未下其將劉仁恭穴地以入得其城有驕色處存夜率輕兵三千蒙以羊皮布之野伏精騎於他道全忠軍望見以爲羊羣爭趨之伏發大敗處存復取易州全忠道還盡失芻糧仗鎧懼得罪哀其餘衆反攻可舉自度危急不支引其族登樓自燔死

李全忠范陽人廣明中爲棣州司馬有蘆生其室一尺三節怪之以問別駕張建建曰蘆茅類本澤生公家有之茅土兆也公勉樹功業當傳三世無忘斯言無何罷歸復事李可舉爲牙將可舉旣死衆乃推爲留後光啓元年拜節度使未幾卒子匡威自稱留後朝廷因授以節鉞素性豪爽恃燕薊勁兵處遭時亂離繕甲治兵陰有雄天下意與赫連鐸爭雲代蔚州李克用

遣安金俊來援。佳威射殺之。囚與朱全忠等表請共討沙陀。張
濬禍起於此。克用攻雲州。前鋒薛阿檀設伏河上。鐸以精騎來
追。抵河遇伏。大敗。禽其將。賈塞兒遂圍雲州。堅而守之。分兵出
井陘。屯常山。大掠深趙。佳威以步騎萬餘援王鎔。克用還。因急
攻。鐸會食盡。鐸棄州奔克用。遂取雲州。表石善友爲刺史。鐸本
吐谷渾部。曾開成中與父率種人三千帳自歸。其守雲州凡十
五年。至是失其地。克用屢攻王鎔。鎔節來求救。景福二年。佳威
自將援之。將行。置酒大會。時弟佳籌爲兵馬留後。至檢校司徒。
其妻張氏有美色。佳威酒酣。報之心懷忿怒。伺其軍次博野。卽
誘衆據城爲亂。自稱留後。朝廷授以檢校太保。充節度使。佳威
部下聞之。悉逃去。不得已以符印歸之。退無所往。遣判官李抱
貞入朝。上書願覲京師。時數遭寇難。聞佳威來。恐社稷復危。人

懷疑懼傳言金頭王且至皆亡竄山谷抱貞還世咸方客深州
銘使人迎之館于梅子園抱貞少遊燕趙每徘徊常山愛之不
能去以世戚失國無聊時與登城西大悲浮屠顧覽山川泫然
而泣因與其謀劫銘陽爲繕甲治兵指授方略陰施予以領士
心鎮軍皆惡之謀不能剋被殺世籌內雖懷憾迫於大義上表
聲銘之罪訴聞諸朝出師攻樂壽武彊以報其怨燕人當奪位
時不義世籌及劉仁恭山奔克用倚其謀下武嬀二州世籌兵
敗乃挈其族奔京師至景城爲滄州節度盧彥威所殺掠其貨
貨車馬張氏復爲仁恭所獲獻于克用嬖幸專房後立爲夫人
自全忠至世籌果一門三節止於十年

劉仁恭深州樂壽人父晟客范陽爲李可舉新興鎮將故仁恭
得在軍中以能穴地爲道軍中號劉窟頭稍以功遷軍校爲人

豪勇有大志嘗夢大幡出指端自言四十九當秉旄節可舉死
子匡威惡之不使居軍中徙爲景城令會瀛州軍亂殺刺史仁
恭募縣士千人討平之匡威喜復任爲將使戍蔚州戍兵過期
不得代皆思歸適聞匡威爲弟所逐乃擁戍兵還攻幽州至居
庸阻戰敗奔晉用爲壽陽鎮將素多智善事人每對王愛將蓋
寓涕泣自言居燕無罪以讒見逐因道燕虛實陳其可取之狀
言于晉王信之乾寧元年晉擊破燕命與李存審入城封府庫
以待晉王至悅之卽命權幽州留後留親信燕留得等十餘人
監其軍昭宗授檢校司空盧龍軍節度使明年晉發兵攻羅弘
信以契丹爲辭又令助援朱瑄不出晉王以書責請仁恭慢罵
其使殺燕留得等以叛晉王自將討之戰于安塞晉兵大敗虜
賊於梁表爲平章事益自治兵光化元年遣子守文襲破滄州

逐盧彥威遂取滄景德三州請命其子爲節度使命未下以爲
稽滯語唐使者旌節吾自有但要長安本色耳何屢求不得無
何拜爲橫海軍節度使父子合兩鎮兵十萬號三十萬以擊魏
屠貝城無少長皆殺之投屍清水爲之不流紹威求救於梁遣
葛從周救魏大敗守文於內黃斬其將單可及復追仁恭自魏
至長河橫屍數百里其勢遂衰連歲被侵破其瀛莫二州仁恭
懼復附于晉天祐三年梁祖自將來攻仁恭調其境內男子凡
年十五已上七十已下皆黥其面曰定霸都涅土人臂曰一心
事主得二十萬人兵糧自具屯于瓦橋梁軍壁長蘆不能近滄
州被圍百餘日食盡人相食死者十六七復求晉救百計方許
合往攻潞以牽梁兵潞破圍始解去仁恭幸世多故倚恃兵強
自稱燕王驕於富貴築宮大安山窮極奢侈選燕美女充其中

與方士王若訥鍊丹求不死藥招浮屠與講法令人和瑾士爲錢悉歛銅錢鑿山而藏之禁南方茶自傾本山茶號曰大恩以邀利季子守光恣愛妾羅氏仁恭怒而笞逐之開平元年梁遣李思安攻仁恭守光自外將兵入擊走思安據有盧龍自爲節度使遣李小喜元行欽攻大安山執仁恭而幽之守文率兵來討至于盧臺爲守光所敗進戰玉田又敗乃乞師于契丹明年引契丹吐渾兵四萬戰于雞蘇守光兵敗守文陽爲不忍出陣呼曰毋殺吾弟行欽識其聲躍馬擒而殺之將吏孫鶴呂充等立守文子延祥以拒守光滄城時又食盡力窮乃降守光素庸至是益驕嘗爲鐵籠有不順坐之于中外燎以火皮膚裂盡燕士多逃禍他境身衣赭黃鶴等切諫不聽適梁攻趙王鎰求救錫勸以趙無罪被伐諸侯救兵先至者霸此不可失之時守光

曰趙王嘗與我盟而背之吾今乃下莊子何以救爲晉敗梁軍
相鄉空國深入守光治兵戒嚴遣辨士大言以動鎮定曰燕有
精兵三十萬願率二鎮以從晉然誰當主此盟者晉人聞之爲
之班師守光益以諸鎮皆畏其彊諷使尊已晉乃陽率天德宋
瑤等五鎮以墨制推爲尚書令尚父復遣人告梁請授已河北
兵馬都統以討鎮定河東梁遣閤門使王幢拜爲河北採訪使
尚父當受冊有司白用唐禮儀曰何不郊天改元對曰此天子
之禮尚父雖尊乃人臣耳守光怒曰我乃爲臣誰當帝者今天
下四分五裂大者稱帝小者稱王我以二千里之燕獨不能帝
一方乎乃械梁晉使者置斧鑕于庭敢諫者死孫鶴以滄州之
敗感守光不殺恩涕泣進諫守光怒命窒其口而臨之遂以梁
乾化元年八月自號大燕皇帝改元應天以王幢齊涉爲左左

相明年晉王存勗遣周德威將兵三萬合鎮定以攻燕自
關入檀涿武順諸州皆迎降守光被圍經年累戰輒敗李小喜
勸以勿降乃遣客將王遵化致書德威答曰予受命以討僭亂
不知其他守光益窘獻銀絹千緡百遺將周遵業告于德威富
貴成敗人之常理錄功宥過霸者之事昨者妄自尊崇本不能
爲朱溫下耳豈意大國暴師經年幸少寬之德威不許登城再
呼公三晉賢士獨肯急人之危乎遣人以所乘馬易德威馬而
去因告以俟晉王至卽降是夕小喜叛降于晉軍明旦城破執
仁恭及家族三百口守光與二妻李氏祝氏三子繼珣繼方繼
祚南走滄州已而被擒見晉王叩頭請死命械以從還過趙王
路置酒大會願見仁恭父子晉王命破械出之引置下坐飲食
自若了無慙色至太原獻于祖廟還矢先王命李存勗至鴈門

刺其父子心血祭墓然後斬之。

侯希逸平盧人身長七尺，豐下銳上，少習武藝。天寶末，爲本軍裨將，守保定城。祿山反，署親將。徐歸道爲平盧節度使，遣中人韓朝陽招降希逸，卽斬以徇。與安東都護王玄志合兵襲殺歸道，遣使上聞，詔授玄志節鉞。乾元初，玄志卒中使來問軍中所立副將，李懷玉姑卽希逸母，因共殺玄志。子推希逸爲留後，除兼御史大夫、節度使如故。以近賊數爲所迫，率勵將士累破逆徒，向潤客李懷仙等方多難，時外無救援，吳頰又侵之。與懷玉謀拔其軍二萬餘人浮海且行，且戰，遂達青州，入據之。自此平盧陷賊，朝廷因以平盧冠淄青，就加希逸平盧淄青節度觀察。管內營田陸海運，抑新羅渤海兩蕃等使在鎮，甚著聲稱。理兵務，農遠近美之。寶應元年，與諸鎮同平史朝義，加檢校工部尚

書賜以實封圖形凌烟閣私艱起復檢校右僕射上柱國封淮陽郡王後漸縱恣政事怠惰尤崇釋教且好攻遊與工劍寺軍州皆苦之詠泰初懷玉因衆怨逐之奔歸京師卒年六十二贈太保

李正己卽懷玉高麗人生長平盧爲營州副將歷折衝都虞候素驍健有勇力方回紇恃功強橫諸軍皆下之獨欲以氣吞憚因與大酋角逐衆軍皆聚觀正己擒傾而批其背衆軍呼笑暴恣稍缺遷平盧兵馬使久之希逸忌其沉毅得衆心因以事解其職役爲軍中所推詔授檢校工部尚書兼御史大夫青州刺史餘如故賜以今名大曆十三年加右僕射同平章事封饒陽郡王許入屬籍其爲政嚴酷所在不敢偶語初有淄青齊海登萊沂密德棣十州之地因攻李靈曜得曹濮徐兗鄆共十有五

州法令齊一賦稅均輕最稱強大方與諸鎮雄霸相競遣人至承嗣所被囚乃大發兵臨魏境指期進討承嗣懼厚禮遣歸具列境內戶口兵糧之數以奉正巳日承嗣老矣子咸不令悅亦孱弱今爲公守曷足以勞師旅哉繪圖其像焚香事之俄歷檢校司空左僕射太子太保司徒復徙居鄆州使子納及腹心將分理其地建中初德宗明察痛劉文喜劉晏死非其罪心不自安上表諫帝請還其妻子不報聞將築汴城乃約諸鎮偕叛自屯濟陰晝夜教習河南驍然徵兵益備江淮漕舟不通爲改運道未幾患疽卒年四十九 納少爲奉禮郎將兵備邊代宗召見悅之超拜殿中丞兼侍御史賜紫金魚袋歷倉部郎中累署淄青曹三州刺史知節度觀察留後充行軍司馬加御史大夫不改父讞遣大將衛俊救田悅爲馬燧敗於洹水殺傷殆盡德

宗詔諸軍合討從父消懼禍首先歸順大將李士貞李長卿亦以德棣二州降納怒悉兵圍消詔劉玄佐督諸軍救之大敗其兵納還濮陽復攻破其郛納登陴見玄佐泣且悔懇求救罪質其弟經并子成務遣判官房說送于京師帝聽中使宋鳳翔言以納計蹙請無放乃繫說等禁中納復還郛州五叛合謀僞稱齊王置百官興元罪已詔下納始効順追贈正已太尉授納檢校工部尚書進右僕射同平章事封隴西郡王以發兵破希烈解陳州圍洮檢校司空賜封戶五百貞元初升郛州爲大都督府改授長史薨年三十四贈太傅子師古累奏至青州刺史築三汉口城歲專鹽利數十萬軍中請代帥職詔起復右金吾大將軍節度觀察如故武俊敗其新立舊將多死頗易之率師次德棣將取蛤蜊及三汊城師古令將趙錡拒戰會士消先濟

河營中火起驚惡未進德宗遣使諭武俊罷兵令師古毀三汊
口賊自是雖外奉朝命內嘗畜侵軼之謀招集亡命厚養之以
爲已用僚屬獨孤造入奏恐其言洩遣將王濟縊殺之衆咸畏
死不敢異同母憂起復歷檢校禮部侍郎右僕射妾媵並封國
夫人貞元十六年加平章事德宗崩冀因國喪侵畧州縣俄聞
順宗卽位乃罷後累至檢校司徒兼侍中卒贈太傅子明安後
爲朗州司戶參軍 異母弟師道時知密州判官高沐李公度
潛使迎奉宰相杜黃裳欲乘其未定以計分削之故朝命久不
至謀於將吏欲哀兵守境沐固止之更請進兩稅守鹽法中官
吏遣判官崔承寵孔目林英相繼奏事憲宗以方計劉闢未暇
遂命建王審邈領節度大使授師道左散騎常侍兼御史大夫
權知節度留後俄加檢校工部尚書長史節度如故權衆不附

益用嚴法大將持兵鎮外皆質其妻子或有潛謀歸款無少長皆殺之元和五年進右僕射伐蔡之役帝以心骨懷異徵兵不及師道還卒二千抵壽春聲言助討實欲援接詭計燒河陰募壯士劫宮闕遣將曹嘉珍賊宰相武元衡先於伊闕陸渾間買田以舍山棚人及是令嘉珍門察部分之以屬嵩山僧圓靜時內外皆陰受僞署使爲調察故無知者意專倚蔡爲重使劉晏平間道走淮西察其虛實歸言元濟暴師數萬乃晏然居內與妻妾博戲必敗之道師道惡聞怒以他事殺之及聞李光顏拔凌雲柵始大懼遣使歸順帝命柳公綽慰撫加檢校司空蔡平又遣張宿諷令割地質子以贖罪始肯納三州遣子弘方入侍既而中悔諸將勸以蔡僅四州尚能拒命今以十二州何憂不克大將崔承度進曰諸將素非公腹心今一旦委以兵若朝廷

誘之以利卽皆背去師道悲遣詣京還戒侯吏圖之遂不敢還
帝復令李璡責其背約旣至嚴兵以見願得要言還奏以軍不
協爲解帝怒詔削其爵促諸軍進討李愿使王智興破其衆斬
二千級獲馬牛四千略地至平陰鄭權又敗之福城斬五百級
李祐敗之魚臺取金鄉韓弘拔考城李夷簡命李聽趨海州下
沐陽朐山進屯東海光顏攻濮陽收斗門杜莊二屯弘正再戰
東阿殘其衆五萬禽將夏侯澄等四十七人師道每聞屢敗輒
怍成疾左右莫敢自有詔悉赦澄等還隸魏博義成其中有父
母在欲還者優遣衆皆感慰相告故劉悟得行其謀師道與弘
方匿潤間悟就擒之并斬其首傳京師暴尸于道有士英秀殯
之城左馬總葬以士禮妻魏氏素與悟亂并男没入掖廷堂弟
師賢師智姪弘翼配流遠州自起至亡凡六十年 洎初爲徐

州刺史歸順後加御史大夫封湖陽郡王食實封二百戶仍充
招諭使遣巡官崔程奉表奏徐一州不能當賊若得海沂共爲
一鎮必能立功已與二州刺史王涉馬萬通等素約必待詔命
方敢徵守盧杞怒程先白張鎰故所請不行及納遣兵攻徐勢
益張大始加汴徐海沂都團練觀察使尋又加密州然皆爲賊
據汴大發憤以疽殆遷檢校戶部尚書贈左僕射

劉悟卽全諒從子少有勇力性果毅全諒器之署爲牙將豪橫
犯法懼罪奔潞王虔休復署爲將謝病去師古厚弊迎之妻以
從妹許其必貴然破吾家必此人也令管後軍壯士署牙門右
職奏除淄青節度都知兵馬使兼監察御史歷事師道時以軍
用屈令督率賈人錢爲助悟獨寬假人皆歸賴及師道被討田
弘正屯陽穀遣悟將兵屯于曹以拒之悟徒營澤趙魏師踰河

取盧氏壁阿井城中飛語悟當爲帥師道內疑數召計事陽疾
不赴密遣使賫帖授兵馬副使張遄使害之悟竊知亟召諸將
謀曰弘正兵強出戰必敗不出卽死今天子所誅惟司空一人
悟與公等皆爲所迫假令就死何如整戈以立大功轉危亡爲
富貴耶衆咸聽命悟乃立斬其使返兵取郛火其內城門不數
刻就擒論功擢檢校工部尚書兼御史大夫義成軍節度使封
彭城郡王賜實封五百戶錢二萬貫莊宅各一區元和十五年
入覲改兵部尚書穆宗卽位進右僕射同平章事移鎮澤潞朱
克融叛加司空移鎮盧龍阻王廷湊不得入進司徒兼太子太
傅充幽鎮招討使與監軍劉承偁不叶聞與都將張問謀逐悟
擒至牙門殺其二僕欲并害承偁其屬買直言質責始麾兵退
匿而囚之朝廷不獲已貶承偁自是悟頗縱恣亦効三鎮招納

負罪不遷之徒矣。章論事辭旨不遜，俄賜血卒，贈太尉，遣表請子從諫繼續戎事。從諫母微賤，少狡獪，初爲師道門下，別奏除將作監簿，與諸奴交通，日相戲博，密知陰事，以是悟得先事爲謀。及欲謀代襲，多持金帛以賂權貴。李逢吉、王守澄納之，數以爲請。朝議澤潞內地與河朔異，不可許。僕射李絳奏：「悟死衆不同，亂從諫威惠未著，若乘其未備，詔大將馳入軍，情有屬謀自屈矣。」敬宗不聽。乃以晉王遙領節度，大使起復從諫守金吾衛大將軍，檢校左散騎常侍兼御史大夫知昭義節度，留後晉王帝所愛子，饋獻相望。未幾，授節度使，檢校工部尚書，以引鐵騎黃頭郎救李聽得赴鎮。進檢校左僕射，封沛國公。反父苛政，多從寬厚，下心益附。昭義自悟時治邢州術者李涿謂從諫曰：「往歲長星經斗，公生直之。今鎮復至，當有災。」故復還治潞，大開

毬場興工役鑿柳泉以厭方年壯思立功太和六年入朝文宗
待遇加等進檢校司空同平章事見朝廷事柄不一公卿多以
私心委托心甚輕之始存驕吝適甘露事變中人得志天子孤
弱乃三上書譏切中人鄭覃李石新執政藉其論執以立紀綱
嘗劾蕭本非太后弟仇士良積怒倡言從諫志頗窺伺因與朝
廷猜貳武宗立兼太子太師素性奢侈多修居室輿馬舊貿易
徙長子道入路惟馬征商收鹽貨銅鐵稅入不貲然無遠畧賈
人子獻口馬金幣卽署牙將遣人行貨所在暴橫惟責子錢州
縣不應命卽爲劾治或遣客游刺故天下怨怒有大將李萬江
本退渾部來歸牧津梁寺地美水草馬如鴨而健世所謂津梁
種歲收價數百萬子弟姻婭隸軍者四十八人以多豪縱懼其
生變誣爲叛誘之有馬高九尺獻上不納疑爲士良所沮心益

不平又懼士良方寵再欲入朝恐不免禍因被病姬妾小過輒殺之或言琢所興造皆逆歲疑有異謀使稹數其罪殺之府中恂恂遂卒年四十一贈太傅從子稹父從素仕右驍衛將軍從諫病甚與妻裴氏謀令主軍事輔以大將王協郭誼劉武德劉守義等卒後秘不發喪僞遣人請醫於朝偕中人至惟加賄謝不令閱視百計沮止諸將密詣監軍崔士康邀說請如河朔故事士康不敢從至喪次扶稹出爲褻絕巾遂見三軍帝聞怒謫使者隸恭陵稹所遣姜岑梁叔文叔明三輩皆送京兆府杖死詔稹護喪還東都不奉詔乃削奪官封敕王茂元屯萬善劉沔守昂車關壁榆杜何弘敬柵肥鄉侵平恩王元逵次臨洛略任堯山向城陳夸行營冀城侵冀氏茂元別遣將管天井闢爲賊將薛茂卿所破執四將火十七柵張巨進攻萬善不能下茂

元欲走會日暮賊自潰去時茂卿自負有功冀厚賞或罪其取
怒朝廷旌節將益難致大失厚望賊又憚陳許士慄勇反與忠
武王宰通僞戰卽北遂委天井奔澤州左右七替復潰使諜言
澤可取願爲內應稹聞誅茂卿宰破劉公直拔陵川沔取右會
圖李石代沔鎮河東兄恬爲洛州刺史稹因移書乞降帝不許
欲令面縛往受右拾遺崔碣諫貶鄧城令敢再言罷兵招納者
斬稹不肯出俄而太原將楊弁求與連和稹諸將議我本求承
襲非爲反叛拒不納械送其使遣康良仝屯鼓腰嶺敗太原兵
生禽卒七百帝猶不釋稹府中財貨山積故李氏家奴王協復
請稅商人使劉溪等分出檢實溪弁閱齊民貲十取其二百姓
怨怒從舅裴問守邢州募豪姓子弟爲兵號夜飛將其家輪貲
不時被囚問以爲言溪大怒問因殺溪與刺史崔嘏投成德軍

王釗守洺州給土布人一匹襁褓以代歲廩釗怒悉發庫物賞
士亦送款魏博軍磁將高玉堯山將魏元談皆以次降元逵怒
久爲賊守殺之稹聞大懼稹與協等始議圖稹使董可武誘至
北第飲酣斬之悉取從諫襁褓子二十餘并稹弟積匡周與軍
中素不附者俱殺之殄張谷張沿陳揚庭李仲京王渥王羽韓
茂章茂實賈庠郭台甄戈等十一族函稹首送王宰獻京師帝
御輿安門受之告于廟社稹日望旌節斥從諫妻裴氏伏夾室
收其貨貲德裕建言亂由誰始不誅無以懲姦先是有狂人呼
於市曰石雄七千人至矣從諫誅之至是詔雄率兵如數以入
縛誼與協公直武德可武并安全慶李道德李佐堯等悉送京
師伏誅士康杖殺梟將白惟信數與雄戰懼不敢降逃武鄉殺
都將康良佐降於盧鈞詔剖從諫棺尸尚如生三斬之讐人爭

剔其骨誼兗州人兄幾事悟爲牙將常愛溢山秀妙營葬其地
望氣者言當三世爲都頭異姓然寔不可深若過二丈不利誼
欲求大貴穿三丈得石蛇并三卵工破之流血至是誼及歲三
子同誅谷沿楊庭皆有文能言古今成敗從諫善遇之咸爲府
佐谷納邯鄲人李嚴女號新聲常諫谷曰始天子以從諫爲節
度非有攻城畧地之功直以其父挈齊十二州還天子去就間
未能奪其嗣耳自來未聞以一縷一蹄爲天子壽左右又皆無
賴妾觀章武朝雄才傑器尚不能固况從諫乎君當脫族西去
大丈夫勿顧一飯恩以骨肉腥健兒言訖悲涕谷不決反畏言
泄縊之故及於難仲京訓之兄爲蕭洪府判官擢監察御史渥
播之子羽涯族孫茂章茂實皆約之子庠餽子台行餘子俱因
甘露難羸服來奔戈頗任俠親任在諸人上屢爲從諫報讐隙

號僞荆卿裴氏父敞本冕裔先辟悟府故納其女封燕國夫人
寬厚有謀每勸從諫入朝爲子孫計時妾韋氏專寵從諫請封
夫人詔至裴抵去曰淄青李師古四世阻命不問側室封者君
承朝廷姑息宜自黜削以求洗濯乃更祁族滅耶韋恨之及至
京誣以李丕降裴對諸將妻號泣故叛將益堅裴乃賜死以屍
還裴問丕善長短術與從諫厚署大將懼軍中嫉其才乞爲游
奕遂自歸帝召見擢沂州刺史後歷汾晉二州大中初拜振武
節度使檢校刑部尚書党項叛徙邠坊卒 又李兼孫名佐之
累調河南尉號強直因客路爲所禮留不得去署爲觀察支使
妻以從妹力諷從諫使還東都王協等譖殺之唐僉裔孫武鄉
令漢賓固諫稹歸朝舉族見害大中初贈本縣令李師晦本宗
室子辟悟幕府見從諫恣橫假求長生術遁居于沙帝爲擢伊

關令而贈薛茂卿博州刺史先時鎮將死皆先遣使弔祭次用
贈次近臣宣慰度軍便宜乃與節鉞有異議然後用兵不半歲
未能定警將逆子皆得爲備積初不意帝怒卽見討及茂元錄
詔示積舉族號慟欲自歸而愚懦不決遂至于亡白悟至積僅
二十六年

弘簡錄卷六十七

皇清翰林院侍講學士四世孫遠平校閱

雜行 唐十二之九

藩鎮成德鎮海武寧宣武淮西

張孝忠

子茂昭茂宗陳楚附

程日華

子懷直孫執恭

李全略

子同義

王智興

子晏玉晏宰

劉玄佐

子士寧李萬榮

陸長源

劉全諒

父正臣

韓弘

子公武弟充李質

李忠臣

吳少誠

少陽子元齊揚元卿李祐董重質附

牛元翼

傳良哥李襄

康日知

子志睦孫承訓

令狐彰

子建通

張孝忠始名阿勞本奚種類曾祖靖祖遜代爲乙失活部落酋

帥父謚開元中歸國授鴻臚卿孝忠形體魁偉長六尺餘性寬

裕事親恭孝以勇聞於燕趙與王武俊齊名天寶末爲內供奉

安祿山奏任偏將破九姓突厥先登陷陣以功歷折衝果毅從

陷河洛相繼爲安史前鋒事敗歸朝李寶臣奏授左領軍郎將
喜其驍雄性復謹厚甚委信之婚以妻妹谷氏令悉統易州諸
鎮兵馬十餘年甚著威惠加左金吾衛將軍試殿中監賜今名
俄歷飛狐高陽二軍使田承嗣寇冀州以精騎四千出上谷屯
貝州軍容整肅承嗣嘆服以爲未易圖卽引去瓦橋之戰奏爲
易州刺史分兵七千使扞朱滔擢太子賓客兼御史中丞封范
陽郡王寶臣病使弟孝節召之將任以後事懼而不往惟岳阻
兵滔往討慮孝忠兵撓其後使判官蔡雄說曰惟岳孺子公乃
宿將安可不自求福今田悅已破梁崇義屍出井中受誅者五
千卽河南軍計日北首趙魏滅亡可以立見公誠去逆効順建
不世之功豈不美哉孝忠然之遣將程華報謝上表于朝令叅
軍董稹以易州自歸德宗嘉之使代惟岳授檢校工部尚書恆

州刺史兼御史大夫充成德軍節度使賜實封二百戶甚以酒
爲德會家人在恆者爲惟岳所害乃爲子茂和聘酒女契約甚
密奉詔合兵討賊破之東鹿惟岳遁還酒請乘勝攻襲孝忠不
聽將佐勸之諭曰本求破賊今已破矣恆州宿將尚多迫之則
死關緩之必改圖且酒言大猷淺可與慮如難與守成吾雖義
豐正以坐待惟岳之亡耳旣而酒亦不進月餘武俊果斬惟岳
首以獻如孝忠所料乃分惟岳地爲四各置觀察使以易州界
孝忠後又降定州刺史楊正義併有易定之地建定州爲義武
軍以充節度使兼易定滄觀察團練等使檢校兵部尚書酒與
武俊謀叛唱以金帛拒而不受雄復來說辭曰孝忠性直業已
効忠不復助逆往與武俊少長相狎深知其心翻覆不可盡信
司徒幸記鄙言後始相憶易定居二兎間四面受敵乃修峻溝

畢整飭器械。感勵將士。乘城固守。甚有可稱。加檢校左僕射。增
實封百戶。後爲朱滔侵逼。詔李晟實文場往援。與晟戮力。整訓
士衆。竟以保全。賊不敢入。因以女妻晟子。恩及上。幸奉天。令大
將楊榮國提銳卒六百從晟入關。赴難收京城。有功。進同中書
門下平章事。河北屢遭蝗旱。與其下皆甘粗糲。人服其儉約。推
爲時之賢將。貞元三年。加檢校司空。子茂宗遷尚義章公主妻。
鄧國夫人。昧谷氏入朝。親迎。賞賚隆厚。五年。有司劾以擅興兵
入蔚州。降爲桂管觀察使。削司空。踰年復之。卒年六十二。廢朝
三日。追封上谷郡王。冊贈大傅。魏州大都督。再贈太師。諡曰貞
武三子。茂昭本名昇雲。字豐明。幼有志氣。好儒書。以蔭累官
至檢校工部尚書。父卒。命邕王諒遙領義成節度。起復昇雲爲
定州刺史。左金吾衛大將軍。充節度觀察。留後。賜今名。後二年。

授節度使封延德郡王累遷檢校僕射司空久之入朝奏河北邊事情忠詞切德宗聳聽恨相見之晚錫宴麟德殿賜良馬甲第器用珍幣甚厚遷男克禮尚晉康郡主方欲委以邊任會崩入臨聲哀氣咽大與人異順宗加中書門下平章事遣還鎮賜二女樂及安仁里第皆固讓不受元和二年又請入覲留數月加太子太保復還鎮王承宗叛投恆州北面招討使親擐甲胄爲諸軍前鋒遣諸子分道並進渡木刀溝與賊接戰累獻戎捷會赦班師加檢校太尉兼太子太傅表請舉族歸朝上命左庶子任簡迪爲行軍司馬乘驛赴之卽以兩郡簿書管鑰符印付簡迪遣妻李氏并男先就路曰使吾後世子孫不染汙風吾無恨矣行及晉州拜兼中書令改河中晉絳磁隰等州節度觀察使入京召對延英五刻乃罷表許遷祖考遺墓于京兆遂卒年

五十廢朝五日冊贈太師諡獻武 茂宗以蔭擢累光祿少卿
母亡遣表請起復尚主德宗授左衛將軍加封主鄭國公主元
和中歷閑廐使與吐突承璀善恃恩奏收吐蕃所陷隴右廢七
馬坊地祖先已給還貧民併取麟游岐陽牧地三百餘頃民訴
諸朝詔侍御史范傳式按實長慶初盡以還民寶曆初遷充海
節度使檢校兵部尚書入爲左金吾衛大將軍終左龍武統軍
公主薨諡莊穆 茂和自負有膽氣材畧歷左武衛將軍裴度
奏從代蔡不行被斥後終諸衛將軍 陳楚者茂昭甥字材卿
定州人大有武幹事茂昭歷牙將常從征伐入朝擢諸衛大將
軍封晉寧郡王元和末義武節度渾鎬喪定州軍亂拜爲節度
馳傳赴鎮軍中謀欲拒之故不來迎旣已及郊左右勸無入楚
以爲正墮其計日雪行四十里夜入其州軍校部伍皆楚舊見

之惶駭不敢動衆心始定又徙河陽三城入爲左羽林統軍檢校司空卒年六十一贈司空子君奕亦至鳳翔節度使

程日華定州安喜人初名華父元皓有勇力爲祿山將從陷兩京思明時爲定州刺史華少蒞本軍爲張孝忠牙將李惟岳先任姻黨李固烈爲滄州刺史被誅後詔移州以隸義武孝忠令與交檢庫藏固烈悉取而還軍人怒殺固烈屠其家相與詣華請權領州事孝忠因授華滄州刺史未幾朱滔武俊僭國華與孝忠隔越欲乘勢取滄州遣人遊說不納加兵攻圍華乘城自固久之參軍李宇謀曰城久受圍張尚書不能相援此軍本號橫海領十縣顏海有漁鹽利足以自給莫若絕易定自歸京師建爲一軍勒甲訓兵有利則出無利則守可亢盜之喉襟華以爲然卽遣宇入奏備陳州當二盜之間華疲於矢石德宗嘉之

建中三年拜華御史中丞復置橫海軍卽以爲使宇爲判官尋
加檢校工部尚書御史大夫賜名曰華令歲饋義武軍稅錢十
二萬貫糧數萬自是別爲一鎮孝忠惟有易定二州而已武俊
遣人說華歸已給曰敝邑爲賊攻力屈則下之願借騎二百以
抗賊俟道路通卽從命武俊喜如數假之華欲屈其力使歸朝
留之及武俊歸國河朔無事卽遣所留馬還武俊別陳珍幣謝
過武俊歡然而釋卒贈兵部尚書 子懷直自知留後朝廷嘉
父之忠起復檢校工部尚書兼御史大夫升橫海軍爲節度授
以節鉞宇復請於弓高縣置景州管東光景城二縣爲屬請朝
廷授官帝喜曰三十年不聞有此事命以員外郎徐伸爲景州
刺史懷直來朝寵遇加等進檢校右僕射節度觀察等使還日
衆怒其荒於畋獵不恤軍政其從昆懷信爲牙將閉門不內復

奔還朝德宗優容之擢爲右龍武統軍賜安業里第命虔王還
領節度大使擢懷信留後明年授節度使久之懷信死懷直子
執恭復知留後事迎懷直歸卒年四十九廢朝一日贈揚州大
都督 執恭進檢校兵部尚書封邢國公元和六年入朝憲宗
禮遇遣還加左僕射奏改名權淮西平心不自安表辭戎帥代
以華州刺史鄭權遷爲檢校司空邠州刺史邠寧節度使卒贈
司徒兄弟子姪在朝列宿衛者三十餘人

李全畧本姓王名日簡事王武俊爲偏將遇承宗虐川其軍歸
朝授代州刺史穆宗以田弘正遇害名故鎮州將問所欲言全
畧多陳利害冀合帝意且請盡死力以報遂授德州刺史經略
其事會杜叔良敗擢爲橫海軍節度滄德棣等州觀察使賜今
姓名以崇樹之未幾遣子同捷入朝貢錢千萬旣還奏爲滄州

長史兼押中軍兵馬外示忠順內蓄姦謀陰給軍士潛圖永襲
忌棣州刺史王稷善撫衆家富于財以計殺之族其家未幾全
畧死同捷自爲副大使領留後事重賂鄰藩求領節鉞敬宗持
久不下俄而文宗立度新嗣位大示恩資卽遣弟同志同與
掌書記崔長奉表請命詔拜充海節度使以烏重胤代之同捷
計窮矯言軍中留已不肯受代德棣民多奔入鄆刺史樂濛密
上變事遣人殺之乃下詔削同捷官爵贈濛工部尚書命重胤
率鄆齊兵進討及憲誠李聽康志睦張璠李載義咸出兵傳境
同捷自以與成德有舊傾其玉帛子女以市河北三鎮載義不
從執使者并所賂表獻諸朝王廷湊本圖橫海欲乘其隙取之
引軍來援時以絕廷湊朝貢且兵須夥繁調發不時始置供軍
糧料使以濟兩河諸將更以左金吾大將軍李祐代之王智興

將李君謀以糧兵絕河夜殘無棣降饒安壁兵五千明年肅拔
無棣平原遂轉德州帝遣柏耆宣慰肅拔德州餘卒奔延津同
捷益急乞降肅疑其詐引兵入滄州耆已取同捷及家屬馳而
西行至將陵斬同捷傳首京師詔貸四州租賦流崔長商州其
母妻與子及異母弟同翼等皆貸死徙湖南

王智興字匡諫懷州溫縣人曾祖靖左武衛將軍祖瓌右金吾
衛將軍父緒太子詹事智興少驍銳健行爲徐州衙卒事刺史
李洧因自拔歸李納怒來攻令奉表告急不五日達京師德宗
發朔方軍五千赴之納解去自是拔爲持將歷滕豐沛秋四鎮
凡二十餘年李師道謀沮蔡師數使徐李愬委以部兵抗禦敗
郗將王朝晏於沛又敗姚海兵於豐獲美妾三人卽斬以徇累
官至侍御史本軍都押衙及王師討師道同諸道進兵率所部

八千次於胡陵以騎界其子爲先鋒而自領步兵繼之壞河橋收黃隊遂攻金鄉拔魚臺俘斬萬計以功遷御史中丞賊平授沂州刺史長慶初河朔用兵遷檢校左散騎常侍兼御史大夫武寧軍節度副使河北行營都知兵馬使引兵三千渡河徐之勣卒皆在部下節度使崔羣慮其難制密表請追赴闕授以他官事未行會赦王延湊命諸道班師智典先期入境羣頗憂疑令府僚迎勞諭以十騎入城兵士甲仗悉輸於外智典不悅交通父兄斬關竟入殺異已者十餘人詣郡謝羣治裝赴闕遣兵士送其家屬至埧橋遂掠鹽鐵院緡幣及汴路進奉物商旅貨貨率十取七八又逐濠州刺史侯弘度朝廷以方罷兵不加窮討授以檢校工部尚書徐州刺史充武寧軍節度徐泗濠觀察等使自是務積財賄以賂權勢買其聲譽用度不足哀稅泗

口以益之累加至檢校僕射司空太和初李同捷叛自備黃糧
五月出全軍三萬討之加檢校司徒同中書門下平章事兼滄
德行營招撫使進攻棣州火譙門引水灌城凡七月降其將張
叔連等十輩銳士三千遂拔棣州圍滄州賊始大懼諸將各務
盡力王師有功推智與居首加守太傅封馬門郡王平後入朝
宴於麟德殿賚賜珍玩名馬進位侍中歷忠武河中宣武三軍
節度觀察等使卒年七十九贈太尉廢朝三日葬于洛陽榆林
之北原四鎮將校會葬者千人 九子晏平幼從父征伐累功
至檢校右散騎常侍靈州大都督府長史朔方靈鹽節度使居
官貪黷父晏去鎮擅取征馬兵仗自衛爲憲司所紿滅死長流
康州告於河北三鎮表請昭雪改授撫州司馬卒 晏卒後單
名宰少拳勇於昆弟間最稱偉器長隸神策軍甘露之變以功

兼御史大夫爲光州刺史有美政觀察使段文昌薦改鹽州持
法過嚴人不甚便累擢邠寧慶節度使回鶻平徙忠武軍討劉
稹詔以兵出魏博趨磁州時何弘敬陰懷首鼠間宰至大懼卽
引軍濟漳水宰相李德裕令兼統河陽行營竟取天井關離阻
賊黨因諸子晏實守磁爲顧望計不乘破竹之勢詔書切責宰
懼急攻陵川破石會關進攻澤州其將郭誼遂殺稹降宰傳首
京師卽令鎮太原宣宗初入朝厚結權幸求宰相周墀劾之乃
還軍吐蕃引黨項回鶻寇河西詔統代北諸軍進擊以疾不任
事徙河陽罷爲少保分司進少傅卒 晏實幼機警智典自養
之故名與諸父齒稹平擢淄州刺史終天雄節度使晏舉仕至
左威衛將軍

劉玄佐本名洽滑州匡城人少倜儻不事生業爲縣捕盜吏犯

法令竹辱幾死乃亡命從永平軍稍遷牙將乘李靈曜反窺時
無備襲取宋州詔卽以州隸李勉表治署宋州刺史建中初進
兼御史中丞充宋毫穎節度使援徐州李洧斬首萬餘級東南
漕賴以通加御史大夫進圍濮州降守將楊令暉分兵徇濮陽
再降其守將通濮陽津遷檢校兵部尚書兼曹濮觀察淄青充
鄆招討使充汴滑副都統賜貲封戶四百李希烈反與李勉陳
少游哥舒曜聯兵屯淮汝數困賊帝在奉天垂意關東進檢校
左僕射同平章事從收汴都轉汴宋節度使陳州諸軍行營都
統賜今名以尊寵之李納遣使至汴必厚贈遺盛飾美女名樂
從之遊娛故多得其陰謀納最懼之入朝又拜涇原四鎮北庭
兵馬副元帥檢校司徒益封八百戶爲人性豪縱輕財貨好厚
貨汴川益困或傳相國寺佛軀流汗自往捨施將吏商賈聞之

爭往得金錢巨萬因以贈軍其母賢婦人也。月織紵一端示不忘本。數教敕玄佐盡臣節。見縣令走廷中白事。據案當之。退而戒曰。汝思往日事否。玄佐聽之。每待下益加禮。然士卒素驕多不能制。遂殺長帥利剽劫至玄佐。又寵任小吏張士南及假子士朝。士幹輩貲皆巨萬。俄以士朝私其嬖妾。懼事覺。酖玄佐死。年五十八。贈太傅諡曰壯武。士朝奔京師。士幹給爲入弔殺之。帝惡其專。亦賜死。軍中置喪俟代。詔用陝虢觀察使吳濬行至汜水。其子士寧并壻激怒三軍。陵晨甲而譟擁士寧衣以墨衰。尊爲留後。醢大將曹金岸浚儀。令李邁悉出貨財。第吏士監軍。孟介以聞。帝召宰相議。竇參曰。汴人有所挾若不許將合。李納勢不可解。遂起復士寧。左金吾衛將軍嗣節度使其爲人殘忍。淫暴嘗手殺人於杯案間。又弑烝父。諸妾逼吏民妻女。亂之每

攻獵數日始還下多厭苦大將李萬榮故與玄佐同里相善性寬厚得士心士寧忌之奪其兵使攝州事遂懷怨怒伺攻城南未還晨馳入府紿言於衆曰有詔徵大夫入朝俾我掌留務凡在親兵人賜錢三萬內外皆聽命乃分兵閉諸門使告士寧速去遲卽傳首以獻士寧將五百騎奔至中牟亡者已半至東都惟僅委數十人入京勒令就第服喪安置郴州萬榮斬其支附數十人籍貲二十萬勞軍詔授萬榮兵馬留後悉籍驕兵遣西防秋當戍者怨之大校韓惟清張彥琳因其怨使反攻萬榮不勝乃劫運財民貲殺掠而潰惟清奔鄭州彥琳自歸詔宥其死羣之惡地殘卒奔宋州萬榮悉誅其妻子俄進萬榮節度使會病甚以兵屬同里鄧惟恭而署子廼爲司馬出大將李湛張仵伊婁倪等于外萬榮死惟恭與監軍俱文珍執廼送京師杖死

以董晉代之

陸長源字泳之祖餘慶父瑑字仲采舉明經補長安尉歷新鄉
池池洛陽三縣令以清幹稱推抑姦豪人不敢犯任滿輒爲立
祠擢兵部郎中棟驥騎使出爲太原少尹轉西河太守終太常
卿長源少淑哲史恃材傲物始辟昭義薛嵩幕府歷建信二州
刺史韓滉領江淮轉運奏充副使檢校戶部郎中兼御史中丞
罷爲都官郎中改萬年縣令出爲汝州刺史貞元十二年授檢
校禮部尚書宣武行軍司馬軍中政事皆決斷之初至汴州每
事持法節度董晉或有所弛輒執而正之及晉卒令權留後汴
卒素驕多弛憲章揚言當以法繩人懷恐懼加以判官楊凝孟
叔度務行苛刻多縱聲色數與諸妓遊自稱孟郎衆皆薄之舊
例遇有凶變皆賞賚三軍放散布帛令各制服長源性剛不達

通變執言今日不可使同河北以錢買健兒取旌節人心大有
不堪軍情已變不爲防備衆奮前爭殺三人遂得食之是日詔
下拜長源節度使中外嘆惜贈右僕射爲人輕佻諧謔無威儀
然所守廉潔去汝州日送車二乘歎曰祖父起皆車一乘今所
愧多矣其清白如此

劉全諒本名逸淮懷州武陵人父客奴少有膽畧精武藝從平
盧軍戍幽州遂家昌平開元中室韋首領段普格恃驍勇數苦
邊節度使薛楚玉令單騎襲殺之自白身投左驍衛將軍充遊
奕使自是數有戰功性復忠謹爲軍人所信祿山反時平盧節
度使呂知誨受賊招誘殺安東副都護馬靈擊客奴與董秦等
奮議取知誨殺之事聞擢柳城郡太守攝御史大夫俄授平盧
節鉞賜名正臣遣使道海至平原約顏真卿出師各質質子歸

其貲糧而已親領兵同秦襲范陽賊將李歸仁李晟田秀芝等
戰數十合並摧破之俄爲思明所敗奔歸王玄志醜之而卒大
曆九年追贈工部尚書全諒少勇果精于騎射以勳授幽州別
駕陞長史爲劉玄佐宋亳牙將本從父尊行諸劉咸厚待之任
都知兵馬使試太僕卿兼御史中丞劉士寧疑宋州刺史翟良
佐不附已以全諒代之及陸長源被害俱文珍與大將密召赴
汴州令知留後事既至其夜軍復亂乃誅將校部曲五百餘人
始定事聞授檢校工部尚書汴州刺史宣武軍節度宋亳汴穎
觀察等使賜今名視事凡八月卒年四十九廢朝一日贈尚書
右僕射

韓弘渭州隍城人家世素微少孤與弟充俱依母舅劉玄佐學
騎射及長材武過人初署州掾奏試大理評事士寧逐時出爲

宋州南城將更事全諒署都知兵馬使全諒卒汴軍懷玄佐恩共推弘爲留後監軍表奏授檢校工部尚書節度觀察如故益務以忠自表時曲環死吳少誠遣使數輩至汴與全諒謀襲陳許弘始臨鎮悉驅出斬之大選卒徒擊敗少誠又愍士卒長源以來主勢益輕乃陰察軍中劉鋹等三百人素恣橫數其罪咸伏誅自是無一敢肆威望大振隣藩重其人莊重寡言沈謀勇斷益加畏憚值李師古屯曹州本謀鄭滑陽言過汴或令治道答曰師來不除道其情立見師古引去在鎮專務聚財積粟峻法樹威四州軍賦匿爲已有未嘗上供私財積至百萬粟加二倍馬七千匹兵械不計累授開府儀同三司檢校司空憲宗卽位加同平章事方欲藉其形勢用兵淮西更進檢校司徒使班太原王鈔之上及嚴綬爲賊所敗汴當兩河之衝慮有變動拜

弘淮西諸軍行營都統以示柄用而令李光顏烏重胤實當旗
鼓弘亦不離理所惟遣子公武領兵三千隸光顏陰爲逗撓以
危國邀功每聞諸將告捷或累日不怡平日加兼侍中封許國
公食邑三千戶李師道誅弘始大懼請入朝盡革牙枝千餘籍
軍十萬獻馬三千疋絹五十萬匹錦綵三萬端至京冊拜司徒
中書令召對便殿以足疾令中人掖拜宴賜加等預冊徽號大
禮復進絹三十五萬緇三萬疋銀器二百七十件堅辭戎務願
留京師以張弘靖代之憲宗崩攝冢宰俄出爲河中節度使父
子兄弟同領節鎮寵冠當時以病代還卒年五十八贈太尉諡
曰隱當時藩鎮彊者獨弘以名位始終以爲天幸 子公武字
從偃起家衛尉主簿署宣武行營兵馬使以討蔡功授檢校左
散騎常侍鄜坊等州節度使深懼盛滿乞罷入爲右金吾將軍

轉右驍衛大將軍性恭遜不以富貴自處先父暴卒贈戶部尚書諡曰恭子紹宗嗣充本名瑾初署河陽李元弼牙隨敗昭義弘後召主親兵奏授御史大夫性謙慎執禮無少懈徧得士心固勸其兄入朝并已備宿衛弘許之不卽行遣後因山獵單騎走洛陽帝亮其節擢右金吾衛將軍轉大將軍斥軍士虛名者七百人歷少府監代公武庫坊節度使檢校工部尚書會幽鎮魏復亂穆宗慮誅其兵授以義成加檢校左僕射汴軍已逐李勣奔復拒命其將士向素悅充詔移鎮之至則果皆欣躍命兼統義成兵討奔戰于郭橋破之帝始問破賊期對以一月方二旬卽克帝喜加檢校司空籍奔所費爲兵者三萬悉縱之斥首亂千餘出境敢後者斬由是內外按堵人卒賴之未幾卒年五十五贈司徒諡曰肅克難起將家素儉節歷三鎮居處服玩

尚類儒生。乘機決策。動無餘悔。世推善將。李元沒。爲妹二女。周其家。李質者亦節士。始爲牙將。李介托以心腹。及介志邀帥。節勸諭不從。介疽發于首。委質以兵。遂禽介。終金吾將軍。

李忠臣。卽董秦平盧人世。家幽州。朔縣。曾祖文。豈。棣州刺史。祖玄。樊安東都護府錄事參軍。父神嶠。河內府折衝忠臣。少隸幽州軍。材力冠異。歷事節度薛楚玉。張守珪。安祿山。頗委征討。積勞至折衝。耶將陞將軍。充平盧軍使。祿山反。劉正臣爲節度。擢爲先鋒兵馬使。攻長楊。戰獨山。襲榆關。北平。殺賊將申子貴。榮先。欽。擒周釗。送京師。功最多。後以潼關失守。引軍北歸。遇吳王阿篤孤。引衆與正臣同收范陽。已而背約。夜攻正臣。因與戰。破之。追至溫泉。擒大首領阿布離斯。以祭纛。數鼓。正臣卒。又事王玄志。至德二載。令以步卒三千自雍奴爲導。復過海。賊將石帝

廷烏承治來拒與董竭忠退之轉戰累日收魯城河間景城大獲資糧復與田神功下平原樂安擒僞刺史臧瑜等招討李銑承制拜爲德州刺史屬思明歸順節度張鎰令赴郛州合諸軍收河南州縣又與裨將楊惠元大破賊王勣德于舒合口肅宗累詔慰諭令鎮濮州尋移韋城乾元初除光祿卿同九節度圍安慶緒退歸至榮陽賊將敬鍾來襲大破之復米二百餘艘以資汴軍尋轉濮州刺史充緣河守捉使移鎮杏園渡及思明陷汴力屈降賊甫數口夜率壯士五百斫賊營突圍以歸光弼奏聞詔加開府儀同三司改殷中監召至京賜今姓名封隴西郡公實封二百戶賜良馬莊宅銀器綵物命兼郭英乂衛伯玉神策兩軍節度兵馬使與賊將李歸仁李承義戰於永寧沙棚前後數十陣皆摧破之代爲淮西節度使寶應初轉太常卿兼御

史中丞尋授安州刺史仍鎮淮西合元帥諸軍收復東都二年
就加御史大夫回紇留安格等於河陽守財物因招亡命爲寇
忠臣悉討平之道璽始通聞吐蕃犯邊卽日整衆不俟選期上
嘉其忠加本道觀察使寵賜優厚預計周智光進檢校工部尚
書通前實封三百戶大曆五年兼蔡州刺史入朝過陝會李國
清爲下劫掠府庫財物詔訊之乃設棘圍約士投所掠物一日
盡獲七年檢校右僕射知省事李靈曜叛合馬燧戰西梁固敗
之復與裨將李重倩襲破田悅援兵汴州平加檢校司空同平
章事汴州刺史封西平郡王性貪殘好色不識書不喜儒生好
脅逼將吏妻女軍無紀綱所至縱暴人不堪命妹婿張惠光爲
衙將恃勢兇虐忠臣任爲節度副使其子代爲衙將陵橫尤甚
十四年大將李希烈少將丁鵠賈子華監軍蔣知璋等因衆怒

斬惠光父子以脅趣之乃單騎赴京朝廷不責留舉朝請德宗立故侍講張洎受財事露將繩以法忠臣奏曰陛下貴爲天子令其師以乏財抵法未可獨過一人帝意解放歸湖南又辛京果坐私忿殺部曲當死忠臣曰京果合死久矣上問其故對曰京果常從伯叔兄弟皆戰死今果獨存非久應死者乎上爲憫然不加罪其率直多此類卒以鬱鬱不得志僞受朱泚司空兼侍中爲留守京城後與子皆伏誅家屬籍沒

吳少誠幽州潞人以父期爲魏博鎮候遷授諸王府戶曹參軍客于荆南節度使準器之留爲牙門將從入朝迨襄陽策梁崇義必叛密書成擒之略將以自獻李希烈掠其美錄奏之有詔嘉美封希烈通義郡王無何崇義果反希烈用少誠爲前鋒事平賜實封戶五十遂爲希烈盡力以成其叛陳仙奇旣殺衆乃

其推少誠德宗因授申光蔡等州節度觀察留後其爲治能自
儉損務完軍實申蔡自希烈以來老少相沿劫於苛暴罔識朝
廷民至死不見天恩地雖中土幾同蠻貊所產馬少戰惟乘騾
號騾子軍尤悍銳甲皆舊雷公星斗文以厭勝專務詛咒王師
判官鄭常大將楊冀欲謀劫逐之聽命于朝事洩被害少誠乃
曲宥諸將以結其心貞元五年正授節度使久之曲瑒率少誠
間陳許無帥以兵攻臨潁俘留後上官浼援兵三千陰通成將
韋清逐圍許州上怒削奪官爵合十六道兵進討師雖衆不立
統帥監軍宦者得輒進退互爲異見戰于小潁河未交而潰棄
輜仗不貲帝乃授夏州韓全義淮蔡招討處置使上官浼副之
令諸將皆受節度與吳少陽等戰廣利城師復敗退營五樓爲
賊所乘遂大潰全義及監軍買英秀等夜遁保潁水汴宋徐泗

齊兵皆走陳州少誠薄潞水而營全義懼亦退保陳州而潞滑
河陽河中兵悉逃歸惟陳許將孟元陽神策將蘇光榮壁潞水
全義乃斬路將夏侯宣滑將時昂河陽將權文慶河中將郭
湘等然竟不能軍少誠以王師不足懼引還又欲絕衆歸向意
假將往來私書數百番持以勅衆曰朝廷公卿託全義破蔡日
盡掠將士妻女分充婢媵以激其怒仍移書英秀求貽雪帝召
大臣議宰相賈耽曰五樓軍退而少誠卷甲不追有自新路帝
初未許會劾南韋皋因賊未平請擇重臣立統帥因薦渾瑊耽
謂重煩元老不如使皋以銳士萬人順流趨荆楚可以撓瑊元
愁不然囚其請罪特加原洗罷兩河諸軍待其禍盈惡周其變
自生帳下帝遂赦少誠盡還官爵順帝卽位進同中書門下平
章事元和初加檢校司空徙封濮陽郡王卒年六十廢朝三日

賈少誠父在魏博相友善少誠
鎮淮西出金帛邀之養以爲弟署爲右職親近無間然嘗畏少
誠將忍懼禍及已屢請任外防禦乃表爲申州刺史兼御史大
夫其爲治尚寬易舉軍附賴及少誠病亟家奴單于熊兒密與
交通矯少誠命名至時已不能言其子元慶年二十餘先爲軍
職少陽密告之自攝副使總軍事時方四討不欲兵迎拜爲留
後居三年正授彰義軍節度使檢校工部尚書自據蔡州五年
不朝在鎮不立版籍隨日賦歛於人地多原澤益畜馬掠鄰州
茶山劫商賈招四方亡命以實其軍屢獻牧馬以自解帝因善
之元和九年卒 長子元濟匿不發喪假以病聞表請主兵遣
醫往視不得見元濟山首燕餽垂頤鼻長六寸凶狠無義惟懼
軍中悍悖之徒初試協律郎兼監察御史攝蔡州刺史惡判官

蘇兆楊元卿將軍侯惟清嘗勸少陽入朝絰兆殺之歸其屍而
囚惟清朝譏誤間贈惟清兵部尚書兆右僕射獨元卿遣人奏
得免因令隨在執紼蔡使少陽死四十日不爲報朝方易將增
戍以須變有傳董重質已屠滅之者吉甫因入賀始爲報朝遣
使弔贈右僕射元濟不納因不得命乃悉兵四出焚舞陽犯
葉縣掠襄城陽翟盡竄許汝居人剝係千餘里關東大恐詔烏
重胤兼汝州刺史引軍壓其境副以寧州曹華戍襄城李光顏
爲忠武節度總兵臨屯析山南東道授嚴綬申光蔡等州招撫
使下詔削奪官爵方大旱雨雪三日乃趨宜武大寧淮南宣歙
山南東及魏博荆南江西劔南東川岳鄂東都懷鄭許汝義成
十五節度合兵進討二月綬屯蔡西郿師小勝不設備反爲所
襲敗于磁丘退保唐州賊攻拔霍丘屠馬塘帝以裴度輔政賊

始懼不能有所指授賊將趙昌凌朝江董重質李祐李憲王覽趙曄王仁清等人自爲戰以抗王師李文通引兵與覽戰史族岡賊其首光顏又大破賊于時曲復與重胤合戰敗賊小波河平其屯墮天子賞綬失律更以韓弘兼都統擢高霞寓唐鄧州節度使十一年諸軍大合文通敗賊於固始拔鐵山霞寓戰朗山斬首千餘級焚其柵無何霞寓敗元濟以爲不足虞併兵以備陳文通乃銜枚夜出九女原屠堡壁三十所分兵西北並安陽山破屯邏降者萬餘光顏復與重胤合攻凌雲柵拔之帝怒諸軍無大功詔旨嚴厲諸將恐懼更以李愬引兵攻其西破屯柵十餘執標將丁士良吳秀琳光顏又與張伯良戰郾城降賊將鄧懷金愬又襲破朗山執戍將梁希果平汶蒼等三壁元濟大懼因奉表請束身歸闕許以不死取行營馬以資行李重質

不與故不得出。愬略興橋得守將李祐與謀襲蔡賊勢益沮。自少誠盜有蔡四十年。王師未嘗傳城復狃小渡五樓之勝。以是益無所憚。其軍本無綱紀。惟內恃城池重固。波濤阻回。故令天下之兵攻三年。纔克一二縣。帝奮然責罷霞寓李遜袁滋等。詔起沙陀泉駟邯鄲勇卒。命裴度督兵度至。大勞將士。皆感激請戰。先顏每冠諸軍。故元濟悉衆特亢時曲。十二年十月十日。愬令祐爲前鋒。已爲中軍。田進誠後進。各統精騎三千。夜襲蔡坎。軍入之。戍者尚不知。明旦攻牙城。防卒千餘接戰。王師縱射。昌與朝江重質及申光戍兵三萬相繼皆降。民相率抱薪增火。焚其門壤而入。執元濟。舉族傳送長安。徇于市。斬之。年二十五。夜失其首。妻沈沒入掖庭。二弟三男流江陵。皆殺之。斬其屬官劉協庶趙曄王仁清等十餘貶。朝江播州司戶度還。以馬總爲留

後析潞州隸陳許蔡始列于王土輸貢賦帝命韓愈爲平淮西
帥愈以元濟之平由度能固天子意得不赦故諸將不敢首鼠
卒禽之多歸功度而愬特以入蔡功居第一愬妻乃唐安公主
女出入禁中訴愈文不實帝亦重悟武臣心詔斲其文更命段
文昌爲之楊元卿祖子華德州安陵縣丞父寓申州鍾山縣
令元卿少孤慷慨有才略及冠漂蕩江嶺縱遊放言人謂之狂
生以白衣謁見少誠署以劇縣旋辟爲從事奏試大理評事轉
監察御史裏行入京見宰相李吉甫具言淮西事深加慰納及
還諭以君臣大義冀格其非心兇黨共構之判官蘇肇保持獲
免其心嘗潛奉朝廷陰耗蔡事願資留後表赴京元濟許之卽
日離蔡以賊勢盈虛條奏濟請詔諸道兵討之爲所覺殺其妻
陳氏并四子肇亦被害憲宗授元卿岳王府司馬尋改光祿少

卿蔡平超授左金吾衛將軍未幾出爲汾州刺史長慶初易置
鎮魏守臣元卿上表備陳成敗利害穆宗久乃悟賜以玉帶進
檢校左散騎常侍涇州刺史涇原渭節度觀察等使兼充四鎮
北庭行軍司馬奏置屯田營壘耕者可保涇人德之加檢校工
部尚書居六年爲立德政碑移授懷州刺史充河陽三城節度
觀察等使何進滔亂請自齋嶽往討文宗嘉之就加檢校司空
又留營田納粟二十萬石以裨經費進階光祿大夫徙汴宋毫
節度觀察等使凡所廢置皆有弘益詔並從之年七十寢疾歸
洛陽授太子太保卒廢朝三日贈司徒素性儉巧好聚斂喜結
交所至得人情凡以此也子延宗訓成中爲磁州刺史坐謀逐
河陽節度使以自立爲其黨所告臺司推鞠得實伏誅 李祐
字慶之爲蔡州牙將有膽畧曉勇善戰自王師致討每領驍兵

抗官軍爲行營將守興橋柵官軍皆憚之李愬擒吳秀琳不殺
秀琳感恩期於報效自謂我無能須得李祐愬乃設計擒祐釋
其死厚遇之推誠定分與同寢食并同降李憲賜名忠義往往
帳中密語達曙不寐人有耳屬於外者但聞祐感泣聲乃披其
衷曲爲愬謀曰元濟勁兵皆在洄曲及西鄙防捍守蔡者皆市
人及疲老卒耳若乘虛掩襲直搗懸瓠城外救不至賊成擒矣
愬深然之其下多以舊怨被殺傷咸欲殺之會大旱三月不雨
以爲不殺祐之譴愬持之泣曰天不欲平賊乎何見奪者衆耶
乃械送京師又慮謗語先卧不能全活隨表救祐曰若祐死必
難平愬上乃宥之愬大喜密以祐謀咨於裴度度曰兵非出奇
不勝此誠良策愬乃出軍以功歷神武金吾二將軍賜以田宅
米粟俄遷檢校左散騎常侍夏州刺史兼御史大夫夏綏銀宥

節度使竇曆初入爲右金吾大將軍尋以吐蕃入寇復出爲涇
原節度使討李同捷遷檢校戶部尚書滄德景節度使累檢校
左僕射卒 董重質少誠子墀因授牙將久托心腹其人性勇
悍識軍機善用兵元濟賴爲謀主領大軍因請以精兵三千由
壽州間道取揚州東約李師道以舟師襲潤州據之遣奇兵掩
商鄧取嚴綬進守襄陽以搖東南則荆衡黔巫傳矢可定五嶺
非朝廷所有又請輕兵五百自嶠嶺三日襲東都則天下騷動
可以橫行元濟庸下不能用當王師連歲不拔元濟約降不赴
皆其謀也後失郾城乃悉發左右驍勇及守城之卒盡付洄曲
使守愬已入蔡計必來救特訪其家厚加安卹使其子持書禮
以名致之方知城陷及元濟囚窘之狀單騎自歸叩伏懇死愬
揖登堦以賓禮待之食上方深懲誨亂必欲快意愬固請始免

貶春州司戶明年轉太子少詹事加金紫十五年徵入授左神武軍將軍兼御史中丞賜金帛尋授鹽州刺史又遷左右神策及劔南西川行營節度使檢校左散騎常侍太和中轉夏綬銀宥節度使檢校工部尚書在鎮訓兵立法羌戎畏服終右龍武統軍贈右僕射

牛元翼趙州人素有材斷與傅良弼齊名王承宗倚其計畫恣爲彊雄擢深州刺史時謂陰謀過廷湊遠甚穆宗知其故用爲深冀觀察使以攜其叛廷湊合幽州兵共圍之元翼固守詔進成德軍節度使以宣武兵五百赴援及赦廷湊賜以深州徙元翼山南東道令中人促上道廷湊雖受詔懷恨不已兵不解裴度詒書請讓淹月元翼率十餘騎冒圍跳德棣赴闕帝御延英引見慰資優縛命中人楊再昌取其家并迎田弘正喪史憲誠

又遣弟憲忠往還說延濬始以弘正喪歸元舅家竟不遣已而
城降延濬入責其堅守盡殺親將臧平等百八十人元舅聞之
憤恚亦卒延濬遂族其家 良弼字安道將河人以射冠軍中
時樂壽與博野皆屬潞州介於范陽成德之間每兵交先薄二
城故號爲劇屯德宗以良弼守樂壽而用李寶守博野皆爲鎮
將兼遏敵使克融延濬連鋒二人各以其衆爲國固守迫之不
從攻亦不拔哉然中峙者累歲朝廷以爲難詔嘉之建樂壽爲
左神策行營博野隸右神策號忻州營拜二人爲都知兵馬使
賜第京師俄受良弼忻州刺史率衆力戰乃得去袁忻州刺史
引兵三千赴任延濬邀之斬三百級追者始退久之憲宗思其
忠勇有狀更賜奴婢服馬召良弼爲左神策將軍寶曆初擢夏
綏銀節度使執還蕃帳亡命來者革其異時饋馬之俗其酋種

咸歡感後終橫海節度使襄累擢保義軍節度使討李同捷王智興奏襲代烏重胤橫海所過暴掠至屯按軍不進入朝盛陳賊勢請濟師欲大調發羣臣議兵太重會棣州平槐不自安願罷領兵留京師更授夏綏宥節度使卒

康曰知靈州人祖植玄宗時縛康待賓平六胡州名見擢左武衛大將軍封天山縣男日知少事李惟岳累擢趙州刺史惟岳叛日知與別駕李濯及部將歐牲血共盟因州自歸惟岳怒遣王武俊攻之日知語曰小兒孱甚無謀安足與共安危公奈何反負天子從賊跳梁哉吾城固士和引以歲月未可卒下且惟岳所恃田悅血鏃邢壕不能殘况吾城乎武俊悟引兵還德宗美其謀會楊榮國以深州降詔即畀之拜深趙二州團練觀察等使賜實封戶二百及武俊復拒命遣將張鍾葵攻趙州日知

破之獻俘京師興元元年以深趙益成德徙日知奉誠軍節度使又徙晉絳加累檢校尚書左僕射封會稽郡王卒贈太子太師子志睦字得衆資趙偉工馳射初隸右神策遷大將軍以討張韶功兼御史大夫進平盧節度使李同捷略千乘志睦挫其銳不得逞遂下蒲臺盡奪其械加檢校左僕射襲王爵徙涇原卒年五十七贈司空孫承訓字敬辭以蔭累左神武將軍宣宗擢爲天德軍防禦使罷冗費市馬益軍威勢奮張黨項聞之還所破射雕軍俘不敢罄加檢校工部尚書封會稽縣男充義武軍節度使會南詔破安南深入內地詔徙嶺南西道節度城邕州合隸容管經略統行營諸軍兵馬分出六道掩擊不利士死十八惟天平卒二千還屯闔軍震動副使李行素完城不出南詔圍之承訓陰募勇健夜縱城燒蠻屯斬首五百南詔解

去謬引告捷羣臣皆賀加檢校右僕射籍子弟嫺昵目賞不及
戰士怨言譴鵬嶺南東道節度韋苗劾之罷授右武衛大將軍
分司東都麗昉反復起拜義成軍節度徐泗行營都招討使賊
平遷檢校左僕射同平章事徙鎮河東宰相路巖韋保衡劾其
迴撓貪掠復不時上功貶蜀王傅再貶恩州司馬僖宗立授左
千牛衛大將軍卒年六十六子傳業嘗從父征伐終鄜坊節度
使

令狐彰其先自燉煌徙家京兆富平代有冠冕父濟天寶中任
鄜州錄事參軍以清白聞本道採訪宋鼎引爲判官初任范陽
縣尉廵民家女生彰秩滿留于母氏遂長范陽性剛儻有膽氣
涉獵書傳頗知文義善弓馬策名從軍初事安祿山以軍功遷
左衛郎將叛後入京僞署城內左衛使史思明時轉滑博二州

刺史令統兵戍滑臺。潛與監軍使中官楊萬定謀歸順。募勇士
善水者。乘夜涉河。請以所管兵馬及州縣降。萬定以聞。肅宗大
悅。賜舊慰勞。先移壁杏園渡。爲思明所疑。遣所親薛岌統精卒
攻之。彰明示三軍曉以逆順。衆心咸附。悉力爲用。大破岌兵。遂
以麾下將士數百隨萬定入朝。上深獎禮。賜甲第。名馬。并帷帳
什器。授銀青光祿大夫。兼御史中丞。滑州刺史。充魏博等六州
節度使。仍鎮滑州。委平殘寇。史朝義滅。遷檢校工部尚書。兼御
史大夫。封范國公。未幾。檢校右僕射。在職風化。大行滑州瘡痍。
未復城邑爲墟。彰以身勵下。內檢軍戎。外收黎庶。法令嚴酷。人
不敢犯。數年田疇大闢。庫藏充積。歲奉王稅。及修貢獻。未嘗暫
闕。時吐蕃犯邊。徵兵防秋。遣將統兵三千至京之西郊。車自資
糧。路次供億。皆讓不受。經閭里。秋毫無犯。時議稱之。性本猜雄。

人有忤意不加省察輒至蹙踣怒頴州刺史李帖遣代者姚興
往不受殺之帖知反殺興與從者百餘奔汴上書白明河南尹
張延賞畏彰拒之以彰劾書先聞斥帖薨州被殺與魚朝恩有
隙不敢入朝會有疾悉上軍府財用兵馬簿籍表劉晏李勉自
代卒代宗咨悼下詔褒美贈太傅子建累官右龍武軍使奉天
之難方肆射士引四百人殿從掘行在中軍鼓角使左神武大
將軍坐事殺貶施州別駕卒贈揚州大都督運爲東都守杜兼
所陷流死歸州通憲宗時宰相李吉甫奏彰忠義奮發子孫不
振同時河朔諸鎮紛紜傳襲上乃召通授贊善大夫然無材略
從伐蔡擢壽州刺史兼團練使被賊焚脅聚陷屯柵懼不敢出
掩敗不奏虛張首級坐貶昭州司戶參軍久乃召爲右衛將軍
後終左衛大將軍